

曬書堂集

麗書堂詩鈔

卷上

五言古五十首

七言古二十三首

五言律四十五首

卷下

七言律一百三十首

五言絕句十六首

七言絕句一百二十八首

五言排律二首

七言排律二首

試帖四十首

詩餘三十八闕

和鳴集四十六首

附

王太夫人祭財神七言絕句十首

曬書堂詩鈔卷上

棲霞郝懿行蘭皋

五言古

讀秦皇本紀

壯哉秦皇帝吞滅杖鞭箠殺人如草菅
阬焚禁毀詆因作阿房宮膏血塗階
阬積骨爲長城邊聲不敢起豈曰
無仁恩二羊六石米

歎劉項

漢王破彭城將五諸侯兵置酒日高會
美人楚歌聲豈

知重瞳來勢若驟雨傾漢軍二十萬穀水流縱橫假令
破城後戰勝如持盈項氏頭可斷誰與分杯羹驕秦以
失之功怠於垂成嗚呼運籌者千載稱良平

鷹相食

爾本爪距利天資復貪酷罔恤同類情偏縱搏擊欲草
枯木葉稀眼疾幽隱矚雪中抖精神狡兔起山麓脫韝
羽箭馳呼聲震林木蕭蕭北風鳴天意助殺戮兔奔喘
未定爪已破其腹鮮血濺石根哀鳴動山谷鳳皇去茲
遠痛楚向誰告雉是文明禽亦復遭荼毒燕雀畏影逃

怒目還追逐種種兇惡狀擢髮難更僕豈意見殘傷殘
傷乃同族昔日分汝甘今日啖汝肉鳴號聲亦哀殘喘
僅絲屬迴憶厲吻時情形頓反覆物理良可畏循環何
太速岸上信天翁知足永不辱

林翁卻金

西門有林翁翁居近負郭跡寄城市間心存田園樂其
家傭工入墾土光閃爍不以充私囊與翁翁乃卻堪歎
古誼衰嗟哉世情薄偶爭錐刀利骨肉相銷鑠林翁不
知書胸衿自揮霍有田故豐饒無金不貧約管寧與華

歆高風差相若

前邑令楊公廬其門曰義高管華

遙望城頭霞朝暉永

灼灼

翁名復初字明善邑中無少長呼之林善人家又素
豐卻金事固優爲之乃其傭人臨財不苟有古廉士
之風深可嘉歎惜其姓名不傳耳嘉慶十二年十一
月十一日奉

上諭據步軍統領衙門奏稱有陝西商販回民馬貴呈
報在廣寧汛小井地方遺失銀四百兩旋據民人呂
有年帶領伊甥張自得將拾獲原銀赴營稟報驗明

無缺等語張自得以鄉曲小民拾獲道遺多金不敢
隱匿告知伊舅呂有年慮及失金之人生計攸關亦
卽赴官呈報該民人拾金不昧重義輕利風俗醇厚
深堪嘉予著將原銀內賞給呂有年張自得一百兩
再加賞官布各二疋竝著地方官製給匾額以旌其
廬餘銀給失物之人領回欽此謹案二事正同竝可
見俗美風淳人心之樂於爲善也因竝記焉

題梅萼

朝來花下遊暮去花間宿夢裏聞清香香雪藉茵褥不

敢開湘簾恐被惡風撲借問溫柔鄉何似梅花屋

雲山

山靜時出雲雲倦復歸山山缺牽雲補雲斷借山連欲
雨雲冠山旣晴山帶雲雲山本相合歎被惡風分山深
仍漠漠雲散各紛紛山雲終相戀此意無人見

曉行四首

殘月在高樹征鐸驚棲禽芳塵馬蹏輒不覺過前邨豈
不畏夙夜而甘多露侵

長路何漫漫良苗正油油凌晨葉露滴新色翠欲流歸

去正食新農言麥已秋

行行過西疇
邈迤東皋下
前有戴星人
乃是荷鋤者
婦日子夙興
觀我田多稼

煙林行不遠
林盡至前邨
乃見一老叟
埽地啓柴門
雞犬繞街散
牆頭上朝暾

夏日

長日儘倦人
散步閒庭裏
樹影滿空階
重重埽不起
因念紅塵中
驂騑未已高
臥北窗人於
今在栗里

霖雨十二章

乾隆丁未六月雨至七月爲農人見憂而作特
取韓詩雨無其極傷我禾稼二語冠於篇首

雨無其極傷我黍稷神不其餒民于何食

雨無其極傷我稷黍歲時伏臘何酤何醕

雨無極兮傷我豆兮草盛苗稀如何耨兮

清曉荷鋤易我園蔬老妻進言子姑徐徐青苔路滑勿
蹶勿趨有童閑閑有女娟娟握衣褰裳推波助瀾瞻彼
中庭如臨于淵老翁扶杖倚門而望童孫數人在河之
濱懼河之圯驚我孫子天公實難時而不雨民曰旱乾

雨旣勤止民復咨怨誰云造化而得人歡

竈蛙趯趯釜魚儵儵彼水蟲兮胡居我屋壞我牆垣漂
我薪木瞻彼棲苴冒茲蓬戶

蓬戶悠悠載沈載浮憎茲蚯蚓出戶而謳匪惟謳止逝
且遊止汝實樂止誰當憂止

夫須笠兮草爲蓑兮驅彼黃犢青草坡兮河將決兮犢
不可掣兮吁嗟犢兮傷如之何嗟復嗟兮公無渡河

稻則有芒蟹亦有匡稻生黍死蟹喜蠶傷黍喜高寒吁
蠶惡下溼

嗟無黍兮曷嘗吁嗟無蠶兮曷裳

雲起西郊逡巡而雨嗟汝雲兮甯莫之禦大風起兮逝
將驅汝杲杲出日勿潤我礎

萊州道中

連天山不斷近海風多寒獨行已爲苦况復值秋殘孤
蓬轉路側落葉辭林端豈止傷搖落兼憂行路難

月夜

當天懸明月物象咸光昭萬葉浮金碧千林靜調刁皎
皎北堂戶流光入綺寮簾紋凝冰色拂之不能消徘徊
下庭除石棱削瓊瑤銀鑰聽未闌萬戶正蕭條五蘊洞

虛空兮冥問參寥

拾海錯

海邊人謂之趕海

大化何齋淪泐無停止天地混沌日滄海何時起一
碧渾涵間今有太古水潮汐割昏曉如斯夫不已月滿
魚腦盈月晦蚌胎死漁父攜筠籃追隨者稚子逐蝦尋
海舌淘泥拾鴨觜海舌卽水母蜆形如鴨觜細不遺蟹奴牽連及魚
婢生物供人用造化意如此鯤鯨在其中芥子須彌耳
圓鑒時一望晉書天文志東海氣如圓鑒磨青幾萬里

女蘿行

女蘿附樗木開花不芳潔好女居桑中身名不貞烈昔
有貧家女嫁於羽林兒未御羅綺裳不解脂粉施甘心
操井臼守分炊爨屢良人饜酒肉身自餽糟醢鄰家冶
遊輩交口稱淑姬良人當遠調踰時不歸來行者易裘
葛居者守簿帷行者日以遠居者石不轉忽然過鄰家
鄰家多狹邪日間貿絲布夜間爲寄貲解爲冶由笑解
塗絳朱脣笥中疊綺縠厨下羅芳珍朝遊柳陌頭暮宿
桃花津豈曰無芳草芳草須芳鄰

山田行

昔余方嬉戲耕田在平地今未三十年耕田在山巔山
田高於屋屋上驅耕犢田萊日益開生計日益蹙地利
原有盡人生齒漸繁寄語催租吏莫敬貧兒門

勵志

五日不讀書筋力欲衰老十日不作文心思已枯槁常
恐名不立青春去人早鉛槧無虛陳經訓恣蒐討况偕
素心人疑義相與考偶然窺新境朗若覩清昊孜孜入
編記日久成初藁

時余方與婉
全輯詩問

敢云希古人亦曰敦宿

好

書帶草

我友周麟之貽我書帶草端容再拜受嘉名允爲寶思
人愛其樹茲物洵美好築土培根茲開池酌溼燥灌以
德日新滋以青未了漢末章句儒門戶競紛擾細大各
爭流其究爲行潦鼠穴強鑽研兔絲自纏繞坐令聖賢
心膏彌雲霧表所以數百年重昏殆無曉一旦北海濱
青天出日杲蹶厥生康成長駕煙塵埽衢堦剗棘荆林
木摧枯槁渾灝納百川靈奇孕三島藝圃爰舊畚書林
乃搜討上溯帝羲軒下迄王豐鎬不其開講席禮堂窺

窈窕東道兼齊魯北學空燕趙乃有庭階前豐草何嫋
嫋紛綸一萬卷龍葱鬱紹繚經笥資披拂綬文門新巧
雨浥映箋注風吹解衿抱迄今二千年青青尙未老豈
曰莖根堅惟有神是保辱余小茅齋珍若贈吳縞夙夜
敬佩之學殖憂不早榮華非所懷此草未見
有花香荒落反其
道生意自欣欣清標殊矯矯經神或見夢彩筆舒文藻
我欲書之紳後世有以考

祭外姑

千秋感知遇難孤國士恩東牀近五載倏已睽音塵外

姑遭閔凶廿六失所天孀母攜孤女形影相依憐訓養
兼恩誼詩禮數晨昏治家尙嚴肅秉心惠且溫迄今三
十年傳誦徧六親行本窮途子落魄守蓬簞維時年旣
壯孤鴻尙求匹蒹葭託青雲有惠賜之室恆督作文字
延師爲評鴈飲食兼教誨殊難罄口筆何圖沈疾嬰埃
風遽上征吁嗟今已矣葵誠何日傾况復遺孤女顧影
悲零丁微風動總帳髣髴聞音聲痛因過時積恩由感
念生碧海深無底之累高不極我無筆如椽何以銘大
德

寒蛩篇

棲霞耆宿樂風南先生之仲子婦王氏于歸三載失所天年甫十九奉養衰翁備嘗艱苦今嘉慶丁巳之歲上距夫亡二十三年矣先生高其義取季子之嬰兒命氏鞠之親題木主立以爲嗣一時傳誦形諸咏歌因爲茲篇以紀其事

寒蛩咽空壁孤鷗棲舊林良人隔重壤之子多苦心應門無尺童高堂慙一老豈惜軀命捐願代子承考自言寒閨女未熟內則篇紉箴奉滫瀡親串俱稱賢粉書字

不滅鸞鏡影長別奉養三十年瑤池鑒冰雪冰雪有消
時丹青無變期君舅曰阿婦阿婦卽阿兒嗷嗷林鳥哺
悽悽寸草句志向黃泉盟心偕白日訴白日照燕門黃
泉泣鵲魂淚枯藁礧墓心惜桑榆暄人生寄隙駒年命
如蕉鹿千載標清風清風在綠竹

常棣篇

有敘

左傳有言召穆公思周德之不類故糾合宗族
於成周而作詩然則常棣詩者召穆公之所作
也不類猶言不肖也糾合言其離散也每讀是

篇令人友悌之心油然而生乃知詩之可以興也壬戌暮春感念先人心傷不類長歎昔賢糾合之難恍然爲戒他日造爲此篇書之座右並示二弟懿林云

韡韡道旁華同類共榮悴如何凡今人根同而末異

十指有短長分居各一方忽然遭虧損慘痛摧肝腸

鴻雁離縉繳帶箭歸林薄烏鳶或相悲鷦雀已相樂

猛虎攫人去齧臂弟代兄酒食生嫌怨睚眦共鬪爭

華妍復解語鶯嬌更巧嘯前時帶箭雁今日飛東西

解五

解四

解三

解二

解一

姬姜如絲麻漚漚分清濁臧獲顛顛輩何故工謠詠

解六

謠詠日益尋薺芥日益深昔爲脣與齒今爲商與參

解七

兄競南園桑弟爭北園柳父母生兒時桑柳皆何有

解八

築婁有後先本自同室人交近情易離勢遠分益親

解九

蹤跡相與遠性情相與淺百年本須臾何必競長短

解十

鴻鵠篇贈鹿萐谷之官溟南

鴻鵠豐羽毛雲路高翱翔雞鶩處籬落翹首睨其旁君

家在東海與余爲同鄉束髮受書後相偕走名場君主

騷壇盟余亦附景光文戰常拔幟聲譽日騰揚馳驅二

十載君遂獨高驤余仍因鹽車躑躅上太行更閱十年

所始復共頡頏給事尙書省牽絲粉署郎明允君誠擅

疎拙余自將君著平反績余慙會計長浮沈幾十稔君

出牧南疆循民問疾苦和緩夙稱良

質谷素工醫

仁風扇

棟清水照蘭滄伊余尙局促天海遙相望著書用何等

溫經備遺忘清貧守故態索米庸何傷君至滇池日第

一問點蒼金馬碧雞神有無涉渺茫盛覽張叔輩文學

開遐方人物及山水竝探入詩囊他時郵寄余爲君舉

一觴此行近萬里潘鬢新含霜臨歧各言別驪駒踐康

莊努力加餐飯聲播鳴琴堂

清時重治理報最登嚴廊徙官符三丙

君丙午登賢書丙辰成進士今

以丙寅遷官也後會應相當行行君莫顧勉勉余未遑何時賦歸來林泉共徜徉

七月六日冒雨赴署

俗人言織女七夕渡銀河余生五十載未覩星曾過又言此夕近雨淚雙滂沱豈知古織女今老猶情多鮫淚綴珠網絲雨漂秋羅郎官位應宿府吏藁分科檄移走旁午文字稽謬譌冒雨驅車馬羸敝奈愁何天街泥又

滑

帝城恩復波我欲理舟楫手中無斧柯我欲汎斗牛海上無仙楂身是農曹輩且復問禾麻今年甘霖足滿篝復滿車公庭少案牘邊方靖干戈公餘飽食後捫腹酣吟哦

自巧夕後一日雨至翌前二日

推翻烏鵲橋倒瀉銀河水烏蟬拏淵傾黑雲壓城圯街泥沒馬膺田萊生禾耳所見戴簷人無非張蓋士簷瀑無停流屋漏有故紙昔爲階與庭今爲沼與沚蛙腳交

竈徑蝸涎亂垣堦所望旣晴佳甯言其雨喜天亦真難
爲而人不諒只暘旱生吁嗟淫霖更謗訾請召風伯神
衝飈東北起迅掃陰霾天放開旭日晷

秋夜記事

家人半未睡屋上聞行聲開門把火看萬籟空虛清又
疑非人跡競逐走狸鼯因何踞瓦裂髣髴如人行我室
雖懸磬薪米猶關情母乃杯蛇影空俾池魚驚閉門卻
復睡河漢當天橫

反送窮用徐曉初韻

窮乃我之友何因見遣送送去須迎富富將受玩弄貧
人常得閒富人多不空未辦黃梁炊已覺黑甜夢回頭
竟何有爬搔短髮鬆豈若囊雖空還餘酒滿甕微醉狂
吟詩春禽雜謠哢有時強著書談言亦頗中我友交我
久兩情竝愚慙願保歲寒盟一任人譏諷

嘉慶甲戌七月五日同人於萬柳堂集爲北海鄭

公生日設祭賦詩紀之兼呈同集諸子

古今如旦暮燕齊猶比鄰天涯聚首日共拜傳經人城
南選勝地遲客聽車輪柳條踈垂帽芳草如鋪茵我生

距千載懸弧後一晨

余以七月六日生

家園傍通德汲古尊經

神書帶縈階下竹窗懷清新論述有至樂擁書不知貧
俛仰一頭雪慨然望車塵敢謂同鄉里鑽研情獨親敬
從諸子後持蔬爲主賓緬想行酒日悽愴歲在辰

答書問

有敘

袁簡齋隨園二十四咏其書倉云聚書如聚穀
倉儲苦不足爲藏萬古人多造三間屋書問藏
書者幾時君盡讀余代答之云

讀書如啖肉其味常在腹一嚮或有餘千跡憂不足萬

卷羅心胸定非飽耳目無奈肉如山入山莫空還
還問入山者材多而取寡答言奔且馳輕鞭加快馬到
處都畱連臥遊須手寫毋云髮蒼蒼秉燭資餘光

詠雪

才過小雪節翩然傾大雪天地微茫間混沌略分別瓦
縫無參差觚棱類玉切踐去如不勝恐同過涉滅身在
冰壺中骨寒神亦徹緼袍冷復冷狐裘熱更熱願教積
雪化爲銀大千世界無貧人或爲縣絮輒且溫衣被普
天少寒門快哉袞袞紅塵盡一掃渾如太初太素氣顚

題

買竹行

有敘

移居齊魯會館之明年六月中買竹數十竿樹之讀書舍後越四旬餘稍抽細筍碧潤鮮新庶少延清賞詩以紀之時丁丑初秋廿二日也

小住如逆旅底事空殷勤雖曰非吾廬何可無此君北地風高寒種樹徒紛紛燕人種竹如種玉背秋涉冬葉不綠縱無渭川千萬竿此間得趣良已足維時月在未穀貴竹亦貴爲博檀欒姿何惜四千費今年遭旱乾植

物傷凋殘二日呼水灌三日爬土看兒童慣好事日來
報平安客入門先喜娛目青琅玕東鄰有鍛者母乃嵇
叔夜碓聲無了時聒耳如同舍我客厭譁欲遷寄公
駕我謂奚必然一枝亦偶借天地區廬幾由旬古今傳
舍更多人但使吾居少有竹何妨終朝食無肉四五十
竿雖言少亦自扶疎繞我屋槿花早榮暮已萎寒蟬秋
嘶夏登木當前快意聊自娛吾本胸中無此竹

除夕

天上無除日今昔平等觀人間有除夕新故環無端迎

新送故歲情似別所歡唯有除不盡書生酸與寒酸存
舊風味寒仍故門闌道不離須臾屯利居盤桓旅筵有
肴核安神薦春盤春意方款曲是日立春冬心漸摧殘忽驚
戶剝啄偷從旁隙看知君索債客聽我言艱難客便勃
然怒語聲譁且謹京官畏三節流年指一彈長安富車
馬半是貧衣冠鶴軀苦饑瘦蜂紙窮緣鑽胡爲鷦巧危
而易鳩拙安勸君且飲屠蘇酒所以黃耆酌以斗樽不
空歲其有饋年餽煮牢九是夕北俗多啖煮餅卽水餃也殷勤相邀庚
申守今日還是尾丁丑明日便爲戊寅首

紀事詩戲作

余家有瓷碗每餐果余腹但求腹不朽何必食有肉微
物關念比車服策勲頻加賜湯沐家人知余此意藏諸
珍如韞櫝歲在戊寅春正月廿有六筭盃竟羽化惶鹿
失蕉覆西鄰隔牆誼且譁碗忽來歸自鄰家完璧居然
復返趙不癢不破聲不沙嘶破見方言六沙猶嘶也見內則注飛去飛來
止經宿狡獪誰爲仙姑麻弈棊轉移局靡定塞馬失得
空吁嗟譬如樹花風飄墮墜茵落溷無不可念余生逢
盛時誤聖吏議廿年官不移長安索米腹中苦飢九年

艱食迄於今茲亦惟曰怨咨自今飯甕欣有具喜氣揚
揚樂不可支稻雪常翻匙從此含哺鼓腹而熙熙加餐
何不食肉糜

黃花魚

卽石首京師名黃花

我家近東海春早紛魚鰕家家豐鮭菜味不數黃花薄
宦遊京邸魚貴倍於米黃花味偏佳方悔前誤詆物論
貴賤有何常惟口於味分低昂海濱山積人不顧名播
皇都字帶香君不見楚人雉給作鳳皇千金市又不見
汧陽豕坐客啖名誇肉美世事悠悠盡如此

酬象思齋雨中見懷之作

七月二日雨後

風颯晚烟涼雨浥輕塵
滌竹徑瀉寒泉花間餘點滴
此時少情閑披卷苦尋覓
心與境爲緣色偕聲俱寂
念君騁驪驪嗤我蝸粘壁

附象

蘿薜搖輕烟支牖對寒碧
溼雲凝不流微雨黯

將夕於焉得偃仰隔斷輪
躑迹緬維素心人焚香展
瑤籍注疏多苦辛誰與分
經席

余酬作欲倣其體終不似之因錄以志賞

玩

詠史

史事新豔可喜古書多有增飾因倣史公合傳
體詮敘其事并論著於篇

昔有呼韓邪竟甯初款塞願言壻漢家漢宮饒粉黛競
買圖中人多負畫工債阿誰恃娉婷欲進無媒介良璞
羞自獻誤被卞和賣漢帝哀窈窕單于喜歸妹婉彼孔
鸞姿竄入鴈鷁隊豈知百年前茲事先有對龍準困平
城曲逆弄狡獪畫入閼氏驚圖窮匈奴怪一紙花貌妍
十萬雄兵退惜哉此良工姓字竟茫昧班書旣無聞桓
譚論又晦

漢書祇言陳平祕計應劭注始或入掖庭間
詳師古以爲出桓譚新論今亡

描寫宮娥態若使匈奴知被欺大索平城誅畫師以罪
黜閼氏按圖索蛾眉又使漢天子不拘文俗陋由余爲
秦謀獻女弭戎寇婁敬主和親修好結婚媾當時朝廷
若不謬策勲應首毛延壽

露坐觀天河

微雲淨如洗河漢明初秋連天波不起當戶聲宵流黃
姑與織女近水甯無憂睨彼匏瓜繫千載空沈浮不食
豈不念胡弗耕田疇西望天駟騰鳴騶誰爇明火夜嬉
遊粟帛紛羅市南頭欲問天上將安求一片黑雲攜雨

過急移繩牀屋裏坐

初見雪欣然有作今茲冬煖邈無雪意亥月廿一
值大雪節風氣陰寒夜未渠央花萼密布霑灑
庭除開門盈矚積素皓然矣

觀書夜習靜扃戶耽深嚴燒燭續殘跋避風輕動簾坐
久怯衣薄爐寒呼炭添斗然肌生粟未擬地撒鹽開門
一縱目萬瓦淩飛檐仰眺天欲霽月斜凍明蟾花生卻
在眼白纏偏依髻曠如遠行客竭來喜憂兼就涼莫趨
煖煖處非久淹敢近湯火地而求雨露霑依隱聊守素

因方以爲廉開樽且獨酌訪戴吾猶嫌

病後作

有淚不輕滴無病誰復呻風寒入肌骨頭目昏津津雖
生不快意恆臥眞愁人旣飲散寒藥豁如解囚縛問安
兒狂喜還乃翁豐饒今同脫鉤魚昨占噪簷鵲始知平
爲福無憂便足樂俗士每帶酸逢人輒言寒請看乞丐
子汝寒豈至此若作如是觀皆當大喜歡辭榮亦辭辱
知足乃恆足我非談道人我解愛此身雖乏金石堅欲
忘紛華慕紛華詎能忘偶爾生覺悟暫覺殊難憑且尋

靜中趣問余何能然因病識其故

除夜詞

歲君慘將別形容似愁絕言我與爾居憐爾爲宦拙空
有范叔寒而無熱官熱落拓二十年不覺頭似雪老驥
櫪還伏唾壺擊應缺但見魚上竿曾微兔營穴余聞心
未然不如歲君說朱門多近憂黃屋少真悅桑霍方作
家樓臺已喋血曾不如豚孤安能及鶩劣伊余轅下駒
終歲守初轍爲米甯折腰問妻尙存舌雖未矜超乘然
亦免傾跌捫腹常熙熙研經亦切切此夕詩客酬詩神

余甘拙宦爲拙人守拙自然樂清貧冷淡生活成閒身
君不見索債似征討見錢論舊好古今天下市道交廉
頗將軍悟不早君勿哀我窮錫我永難老八九十歲翁
何妨任潦倒

箴佞佛

佛出身毒國能了清淨因彼土服其教印度共尉賓不
合入東土堯舜周孔鄰遂令有方士化作無業民民生
重似續莫大乎君親凡在食土毛普天皆稱臣如何袈
裟著公然辮髮落抗不拜人主而且相籠絡雲霧迷香

烟梅檀起綺閣有田不畱畬供養仰耕鑿名爲優婆僧
實享王侯樂樂亦祇能及其身何故衣食勞吾人謂宜
人其人火其書不然彼道其所道吾儒亦自爲吾儒苟
如是者其庶乎胡乃衣冠薦紳輩辱作沙門頭陀徒噉
清齋唱梵唄諷南無下膜拜稱弟子願受戒頭有髮心
無奈衣不緇冠不挂混僧俗真可怪聽鼓趨朝仍作官
下直聽講攜蒲團讀孔孟書笑酸寒孔子生衰周末及
西方佛見老稱猶龍見佛豈體屈口不道六如爲顏說
四勿顏氏雖殆庶屢空了未訖彼教惟了空吾儒及民

物同具慈悲心不爲富貴訕我習儒家言敢云學孔孟
但挾塵垢襲追隨康成鄭蟲魚苦鑽研老至尙未竟素
無參禪功亦無談禪病滓穢點太清卿居心不淨彼我
更相非儒釋兩無競我自讀我書彼佛焉用佞

歎老儒

歎老儒惟知書道味腴世事疏交如水食無魚書千卷
室中虛硯耕穫筆蓄畬心稂莠意誅鋤口所道胸無餘
自怡悅誰共攄挾此術將焉如支離叟不材樗亦曾登
車赴紫陌待詔金門大射策試官置下第拂衣作歸客

歸客云何傷書聲滿大宅匡衡困經生揚雄守古籍不
逢識珍人荆璆亦燕石忽膺當途薦學古入服官官宜
鷗佻巧而獨鳩拙安公子耀裘馬此翁古衣冠彼言良
有茅爾語蹇復難門前羅飢雀囊中無米看室謫翁乃
笑晚達聊相寬孔兄久交絕范叔剩一寒官貧事復迫
不及窮儒軟柳絮隨風飄奚爲自黏著飛蟲挂蛛絲困
雞且解縛本自蕭散人惟宜置正壑何苦強作官又非
被人捉已矣乎賣我車典我襦束歸裝與書俱書爲友
良不孤無長物亦堪娛謀餬口仍授徒食己力非貪汙

有私累無官逋恆安步免走趨耽高臥絕吏呼遊羲黃
樂唐虞老農老圃吾不如請從此去爲老儒

七言古

友石齋爲茹古香先生作

先生招飲友石齋多士紛紛趨而來各異鄉縣同門友
不知姓字共舉杯強語乾笑非款曲石能無言獨免俗
此中欲辨意已忘相對默默情亦足四面羅列看嶙峋
如揖如讓旁無人昵交密友孰非假礫硤此君乃其真
米家之兄先生友祇此石交可不朽坐中歡譙方高談

我勸此君一杯酒

石友齋爲蘭皋擬作 有敘

古香先生以友石名齋余旣作詩紀之他日因思余性嗜石自惟卑賤力不及遠然每獲一石有小佳處輒數日喜觀玩不釋往六七年屬趙蘆洲太守覓汝甯石以非所好久而未獲近前年秋就王式荃侍御乞瀘石侍御言其先贈君性尤嗜此遊幕所經搜尋殆徧嘗到瀘江募人購取厚畀其直所得故多佳者然侍御珍之不

以餉人余再三敦求僅得其不甚惜者凡八枚
余意少之去年冬復乞得二枚又覓得治玉沙
磨其石之陂陀者共置一盤注水其中聊資清
賞私念異時儻力能致遠須構小齋題曰石友
不能自謂友石也亦作一詩因寄所託

蘭皋不敢言友石且道胸懷自悅懌性類頑石生而堅
情欣此君愛不釋因思玩石同玩花偏宜雅稱寒士家
色聲香味兼觸法六者之妙輕豪奢豪奢力雖能兼有
荊棘胸中那可剖石寒且瘦士亦然相視莫逆乃眞友

共偕晨夕愜素心心在吏隱非山林請改蘭皋作蘭石
勸汝一杯酒自斟

王侍御家觀瀘石侍御出其贈公卜亭先生所藏

諸石色態都佳巧構形似詩以紀之兼呈侍御
東井精絡岷山江渾渾洪洪潞水潞神禹鑿山六丁扛
迸出碎石流奔瀧漂漱激轉聲掄撞堆積隄岸紛魚缸
犖駁璘斌瑩如玉月白江清樹映綠半敲蓮葉彈曉鬢
頽梅一枝酡朱顏穠纖淡雅妙寫繪混沌初剖誰狡獪
恐是媧皇補天餘殘賸零星棄江隅人世塵劫歷千百

不磷不泐完此石成都以東夔府西二千餘里沿江谿
瀘州以外絕未有精物應歸神靈守帝臺之基著無人
玉女投壺事非眞璿珠玉果周滿辱趙璧雖還秦人欲
物惟珍美招人嫌鬼瞰其家吏非廉不寶爲寶藏可久
鬱林片石定不朽先生清白遺厥後摩挲汗澤猶在手
鄭重不敢趨而走竦立整冠拜石友

河邊古塚

薄霧冥冥暗林麓陰風獵獵吹山足松楸寡色日將暮
啾啾河邊舊鬼哭岸上新鬼聞而笑自古有死甯汝獨

舊鬼聞言忽長歎歎罷欲言先擲蹙昔我宅兆卜高原
術者建言宜水澳我家子孫竝慈孝厚我絞衾美我櫛
期以百歲千秋間無使土侵膚與肉一朝河水忽吼怒
須臾遷變陵爲谷狐狸穴我幽宮門兒童破此長夜屋
白楊有日摧爲薪宿草無根春不綠遂令善地稱牛眠
到此殘骸剩骨誰掩覆余聞此言忽有觸孔子曰死而
朽也不如速身後那復知榮辱由來萬事隨轉燭無定
河邊百歲髑

花肆行

日聞深巷賣花聲杳然不見栽花地偶因送客過街頭
或曰此間乃花肆行行纔入扉香風襲我衣蘿陰曲徑
仄樹杪懸泉飛松柏獨奇古矯若虯龍舞桃李豔芳姿
燕姬年十五榴花紅映肉不及山躑躅躑躅人不奇榴
花眾稱之小婢街頭來手撚茉莉花誰家貴公子薝蔔
摘露葩薝蔔宜染黃茉莉薰髮香豪門一花草中農十
戶糧今年長安米價貴

天子曰咨汝發棠安得花肆千萬間爲民倉庾儲粟支
十年

此工部詩也人學其聲貌此學其肝腸孰爲工部默
入

紫橐駝歌

橐駝生於流沙磧形龐骨竦紫花香其性善能識伏流
賊躡千里無人跡龍堆蒲海都經遊誤入中國爲人役
中國山路皆陂陀水草不及西域多飲齧不時惟人命
俛首帖耳敢誰何千鈞重任苦難舉脊梁挺著無撐拒
繩穿鼻孔從人牽瘦骨難施紫藤鞭溽暑熏蒸酷炎熱
白汗背浹口流涎蹠伸膝折行不得毳毛脫落皮無色

囚鞍柔脰痛難勝載實圓鳴聊喘息繩牽鼻斷流朱殷
揚鞭怒目還相偏仰噴俛鳴氣不伸嗟乎自咎豈尤人
物惟有欲故可制神龍可豢虎可馴橐駝喜啖雪花鹽
計汝所須亦云廉食人之食供人使驅策不殊犬羊爾
迴首故山黃葉落沙流決潁數千里

慷慨悲歌醉後讀之嗚嗚然

牟默人

古瓦罍歌

何物陶器如餅罍喙然腹大容百觥泥質粗澀模範古
獸齒鑲鑄形猙獰圓孔有五穿其底舉以向日分光明

我疑此物靡所用江海豈庸漏卮盛私怪當年埏埴拙
鑿破混沌殘其形藏此器者爲林氏閒嘗爲我言其情
先人昔宦黃河側黃河千年漠然清閒眺河壩偶得之
雖有其器無其名當時祇供兒童弄今日亦等鴻毛輕
前年有客長安來博雅鑑古識最精因言此物名曰口
簪豚上用鎮狂瀾息旬旬世間此類惟有三奇談眞令俗
耳驚我聞古有驅山鐸曾吟鞞鞞發大聲或置斷壁懸
崖間千山響應齊鏗錚因疑茲物或禹製疏濬江河地
效靈嗚呼於今此器亦安用吾山永奠瓠子平

筆筆有擒縱之力超忽離合的是歌行擅長不似元

白諸公手滑也

牟默人

賭郎行

雍正間人陸鑑明江南甯國府宣城縣諸生

陸家賢婦有焦娘嫁得兒夫是賭郎一擲曾聞連百萬
傷心何意棄紅粧紅粧本是良家子十三嬌小學書史
香閣裁成芍藥篇吟窗養就芙蓉紙方期金屋貯阿嬌
誰料紅顏爲君死陸郎輕薄秀才家終朝團局作生涯
窗下青鐙常暗淡梳中白骨任撾拏是誰畱下陷人坑
邪鬼不生世不成囊中金盡眠方穩榻上鐙昏眼愈明

暮暮朝朝都不辨么么六六時相戀寒士曾無避債臺
佳人屢脫黃金釧金釧雖亡何足悲兒夫浮蕩淚雙垂
一局那能贏別墅千金豈有賭蛾眉錢神不媚酸寒骨
骰鬼偏欺薄倖兒仰屋計窮猶技痒手中還作摩挲想
博進負人積似山中袍典盡鳴孤掌恨殺奸人黃黑心
強將窈窕抵多金黃金有價人無價白璧雖沈志不沈
本謂多情戀箕帚何期掩淚辭羹醢低眉欲寫心中事
下筆難傾言外意粉扇題成絕命詩湘裙書就斷腸字
溫柔敦厚繼風人悱惻纏綿動星使封章朝奏

九重天祠典新邀大表賢蕩子權爲香火使富豪罰以
萬千錢斷指錐心甯云報綱常凜烈斗山懸森森松柏
清風廟至今過客猶憑弔繡輦已自表千秋齋曰還應
稱二妙黃池邨下漾愁津陸生黃池鎮人花草經年怨不春賭
局風光還似舊芳魂月夜定如新殷勤欲問狹邪子可
有深閨飲泣人

雁聲引

三秋之夕羣雁嘈嘈感人之處世有似此者聊
爲賦之

我聞禽聲之中鶴第一其次無如雁聲清鶴唳九霄雁
入雲所以一鳴令人驚塞上之草秋先白牛羊下山日
將夕筆策驚起離羣鴻沈墜悠揚音屢易天陰月黑風
蕭蕭繁聲急響求其曹前者婦後者奴旣恐聲聞爲人
覺復虞相失時相呼紅樹山頭葉聲乾叫起一片霜天
寒此時離人竝下淚高樓半掩銀鐙殘蘂碁宦遊近何
在聞說今秋客雁門絕塞秋深三尺雪雁來卻與雁門
別幾經銜蘆到此間風餐煙宿應愁絕嗚呼孰能爲此
區區稻粱食僕僕朝南而暮北獨不見華亭有仙禽朝

遊雲際暮深林瀟灑疑出塵壚外飲惟清泉啄甘帶長
歌一曲猶未終瀏然洗耳來松風

鐵樹篇

樅樹俗名鐵樹棲霞縣城之北大虛宮前夾道
雙植自余童時僅存一枝壬子春初復遊其地
生意盡矣恐遂湮沒興言記之

我聞鐵樹花開乙卯年此樹從來花杳然或言歲歲花
常著未見其眞語浪傳爾雅遺文會所讀松葉柏身是
樅木憶余總角遊此宮喜見一枝綠茸茸迄今會未三

十載向之存者亦已空至元天子昔好道長春先生抒
偉抱先生豈是黃冠流鼎沸雲擾無時休宋帝覆舟元
定鼎飄然頓作陶宏景清心寡欲不殺人煌煌謨訓垂
箴警太虛宮殿倚雲開先生旋賦歸去來花草皆含仙
氣色懿此二樹新培栽根枝左紐與常異壺中日月誰
復記一任烽煙迷戰場那知風骨帶仙香劫火雖燒終
不死舊傳爲火所
災惟一枝存挺然身如百鍊剛枯者亦終不朽
叩之作銅鐵聲殿
瓦雨漂巢蝙蝠殘枝還向人間綠豈意消息如瓊花瓊
花有日歸仙家柱礎縱橫委瓦礫宮垣冷落無煙霞迤

邇元明入我

朝五百餘年獨後凋嗚呼長春先生安在哉至元天子
竟已矣世人那得身如鐵君看鐵樹猶如此

老少年歌

老少年草名卽雁來紅

君不聞秦皇漢武鬢毛斑日遣方士求三山馳想安期
羨門子往來方丈蓬瀛間文成已誅五利死徐福入海
終不還人世長生信無術何物小草駐朱顏秋花秋葉
半顛顛籬落一枝血色殷翩若少女倚簾櫳燕支幾點
映脣紅又疑白髮龍鍾叟強顏偷入少年叢昔日老萊

辭楚歸嬰兒戲著斑斕衣何時披排上秋草秋草居然
亦賜緋靜之新煮肉芝熟童顏還如十五六更有夏姬
得道年容華絕世老愈妍徐娘亦是多情種半面粧倚
晚風前梧桐葉落橘柚老亭亭獨立斜更好世人勞攘
鬢成霜顏如渥丹輸秋草我今對草發長歎求仙枉上
蓬萊島噫嘻求仙枉上蓬萊島

龍洞山中多海棠欲詣不果歌以代遊

久聞濟南好溪山溪山深處龍洞鬱蝙蝠如斗掠林間
海棠開作珊瑚斑誰家女兒門朱顏人面花貌雙迴環

燕支雨浥紅裙殷餘香入衣散雲鬟有客有客殊閑閑
未能扶筇叩仙關重陽攜酒登高還斜日人影蓼花灣
青峯江上絕塵寰空聞流水聲潺湲

上水石

千巖萬壑盆中間造化雕鏤聳奇觀偶將杯水勘堂注
淋漓濡染造其巔性本就下惟流湮孰激而行竟在山
濃如經雨空翠滴潤似新沐黛痕濺麗譙層觀競吐納
懸崖飛瀑紛鈎連陵夾有瀟山有澗歆飲縱橫頃刻變
迅如迸裂銀瓶漿豁如激射銅壺箭寒氣逼人渾似秋

置我一壑竝一丘石根鍾乳林麓透琪花瑤草春巖幽
硯山奚足誇奇勝弱水眞堪供遨遊安得追隨羨門子
身入方丈蓬瀛洲

己酉下第後聞生子喜甚鐙下醉賦時四月十二
日

長安滿眼杏花春愧我不是看花人浮名得失何足問
天倫之樂乃其眞况於此兒殆英物兆以吉夢符前因
騎尾傳說星中箕摩頂徐陵天上麟奎壁居然論甲子
娠提還擬降庚寅椿諼更喜侍堂前堂前喜見瓜絲絲

紅蘭茁芽既抱子綠竹生筍兼娛親他年吾兒幸早達
莫似乃翁空踐踐

捕蝗行

蝗來也蝗來也一片黃雲罨四野所過皆空地爲赭茅
茨食盡餘屋瓦貪狼很羊似此者長杓短棒帚杈杷殷
殷訇訇謹且譁兵丁捕蝗如捕虜父老捕蝗如捕虎兒
童捕蝗如捕馬婦女捕蝗如捕鼠蝗一斗錢百五蝗一
升二十許門隸盜錢不肯予予又逗遛肆嫚侮民不敢
言而敢怒昨日客從鄰境聞具言蝗蟲能食人

有嬰兒
爲蝗所

啖
前日守士官堪訝具報蝗蟲不食稼一年旱二年水
水說不逢雨甲子旱說不逢歲在巳盜起託言非掠鹵
軍興諱言踐禾黍囚逸聲言空囹圄婦子槁餓官不舉
羸瘦何堪痛箠楚昨已鬻男今鬻女秋成報歲滿篝篋
滿篝滿篋復滿車不在民家在官家鎚銖搜取盡泥沙
金錢山積供豪奢官有祿民無穀窮檐二日一食粥蝦
兵蟹荒稼不熟官蝗又來啖人肉蟲蝗助虐啄人粟蝗
過所在旋生蝻更俾遺種茲邑育食我麥苗不食菽今
年尙樂明年哭

反送窮用徐曉初韻

窮乎依我以爲重我非迎之何故送俸錢雖少官事空
頗有風月資吟弄室無擔儲且減用每日兩餐有飯甕

蘇詩注山東人埋肉於飯下而食之謂之飯甕此借用

淡泊裁宜寒士供粗布衫

子多綻縫破巾短髮任鬢鬆嬾散那期禮數中索債不
驚春枕夢交游雖疎恕我慙妻任呼荆子題鳳有時唱
酬共詠諷讀書何妨強忍凍窮乎依我若伯仲

李將軍 三十韻

將軍閩產而浙宦生應於兵死遇難忠勤勇敢古無匹

惟馬伏波常百萬蔡賊小醜初跳梁跳梁未敢恣汗漫
蟻封潰穴無堅隄蜚弩射人有覩面豈料蜚螻么磨蟲
化爲鯨鯢逞曼衍颶母風起舟船翻乘災利危肆强悍
陽侯之神何不仁坐令凶殘久逆叛天生將軍海嶠間
與賊同生共鄉縣同安縣芳蘭穢草殊薰蕕兇鋒靖
海岸束髮從戎讀兵書妙選期門戴鶡冠出爲鎮將兼
樓船腰中常懸大羽箭殺人如草殫威稜破浪衝鋒激
閃電遂教一舉鴈鷁驅直使三洲鳥獸竄褫旗屢覩渠
魁殲每獲乘舟始罔獻前年追賊出粵關彼已計窮思

逃散賊船高我船三尺仰首攻圍勢不便風吹削柿浮
江頭駕駛揚颿制奇變更兼刁斗都森嚴十萬舟師總
訓練所以兵過如擣虛賊望旌旗已股戰丁卯冬十有
二月下兵南澳伺賊倦乘勝追及黑水洋賊艘唯三更
破爛火弩齊發俱延燒將軍身爲士卒先挂船正欲施
殲擒誰料風颿起水渙人謂賊子游釜魚天哀將軍受
鉛彈壯士盡哭都無聲搏膺呼天未厭亂嗚呼師捷身
亦死求而得仁又何怨虎臣雖死猶如生眞剛原曾歷
百鍊鼠子雖生魂已死不久身殘爲京觀死剉其骨揚

爲灰生割其肉作萬段李伯廟貌

伯立廟同安縣賜諡壯烈垂千

秋能弭灾兵并大患

仙鹿謠

有敘

刺淫也余遊宦京華前後十餘寒暑朋舊凋零
存亡殆半或才名蓋代智略冠時而好竝登徒
魂迷佳俠命懸朝露恩斷情絲可爲悼歎不敢
質言聊託物情以資規諷庶言者無罪而聞者
足戒云

鹿本禽中仙兼食九種草滋液儲靈根容顏故不老雖

能抱骨延千齡亦須膏精愛三寶不然泡影色空身那

有長生久視道谿父山間瓜安期海上棗莊叟逍遙遊

盧生蓬萊島忽然夢入溫柔鄉玉貌花顏婢嬪好

方言卷十

婢嬪鮮好也

牝麀思久勞精魂渥丹難駐類木槁恣情縱慾

喪其軀漁色獵香鹽汝腦身死山林間命難金石保覆

以湟中蕉誰謂非壽考野人葬汝于庖廚老饕餮爾以

醉飽脩短隨化雖歸天禍福已求命自造應由辨之苦

不早君觀野有死鹿篇有女如玉哀窈窕

大氣奔放運掉自如是學少陵而得其神味者

趙鳳崖

胡竹巖郎中邀同戶曹諸子小集思豫堂觀劇是
日甚寒戊寅仲春九日也

初春天氣多晴暄此日朝隱扶桑瞰登樓披裘裘欲薄
臨軒把酒酒不溫主人雅意爲敬客命具沸湯重開罇
妙選歌童出四喜觀者如堵門如市嬉笑怒罵都逼真
衣冠雍容非貌似始信千載以上人懍懍至今尙未死
人生故者方爲陳何妨陳者猶爲新世態反覆難可問
生氣奄奄如陳人灞上棘門同兒戲安知戲場非眞身
眞與非眞兩不朽諸君莫停杯中酒

反明妃怨

達梅岑以明妃怨舊作見示愧無以酬因反其

詞以寄其意

宋書樂志有明妃怨李伯時嘗畫昭君圖韓駒爲序自是以還文咏

甚多各標新義今錄其尤者如宋劉子翬云西京自有麒麟閣畫向功臣衛霍問王庭珪云不如夔州舊邨女三幅羅帶兩髻了元劉因云武皇重色思傾國趙氏承恩亦亂宮自售懸知非靜女漢家當論畫師功許有壬云和親納侮號上策建議詒謀婁敬責吳師道云琵琶馬上無窮恨最恨當年誤入宮王思廉云漢室禦戎無上策錯教紅粉怨丹青明邱濬云當時不遇毛延壽老死深宮誰得知

漢帝和親自失策毛君圖畫焉足責天心妬色如忌才

長沙遭斥朔方謫人彘鉤弋兩奇冤長門團扇永幽隔
漢家薄德誰孤恩恩深終祇結仇隙始知遠嫁翻多情
拜謝君王去紫庭燕支未減漢宮曆黛色常畱冢草青

古鏃韜筆

有敘

友人遺余銅鏃古色斑然蓋幾千年物也余壯
其神武威棱而形體完具因彼空中作爲筆脊
庶兼收文武之資焉

古皇寓兵在耕讀後賢出身別科目武夫投筆驅中原
文士彎弓處白屋兩家正可共盤桓那論鋒端與筆端

要離伯鸞家相望何妨同居不同量前年有客遠方來

貽我尺書親手開其中一鏃三鎌具

方言三鎌者謂之羊頭注云鎌棱也

鄭重摩挲意屢猜精銅爲質形模古不是周秦卽漢楚
疑從沙漠貫雙鵬飲羽或經穿伏虎當時戰場幾回臨
血色斑斑尙可尋破的屢曾驚敵膽寒芒猶有殺人心
殘戈折戟沈沙磧完然此器仍無易宣威久已著疆場
策勲今復到文席回首殘雲掃陣橫累經百戰樹威名
請將新息標銅柱移換頭銜付管城

運巧思於鉅手只覺落落大方

鮑雙五

翼兒順女以危危祠神云是古法余笑而從之爲

賦是詩時閏四月廿四日

兒女焦焦走奔忙我疑非癡卽發狂牲幣紛羅索衣裳
云爲迎富降神香我謂此神不可逐就令要來恐無暇
舉步不離富兒門抗顏甯枉貧士駕貧夫有言富不仁
俗士猶道力勝貧腰金佩銀大如斗寒儒兩肩荷一口
可憐韓君送窮文神若無見亦無聞借問神係何官職
我亦不知復不識南陽有客燔黃羊滿家從此豐穰穰
祠神亦自非荒唐安知禳田不倍償芻茭喚牛兔喚狗

汗流且奔僵且走兒女莫笑顛狂叟也同汝曹拜稽首
祝云自今歲其有噫嘻祝云自今歲其有

愁霖六月下旬雨至七月下旬

不雨自春到夏五草枯石爛盡焦土七月初旬霖復霖
三日以往多不數我疑天公非不仁空教暑寒怨吾人
風旣旦南而暮北雨何徹夜復經晨欲託靈窿通芳訊
今肯布施昔何吝萬斛水向銀河傾千顆珠跳簷渦迅
中庭忽見方塘開我欲乘桴無取材空濛煙重失遠樹
濃碧階滑緣蒼苔頽垣聲裂石砰磕老屋先憂勢將壓

漏痕經夕窺承塵溼暈明晨倒筐篋筐篋津透承塵穿
溼薪蘊火寒無煙苦霖若待歲早用人復何恨呼蒼天

五言律

秋日遊百澗山邨

犬隔疎籬吠人尋曲徑遙野蔬收白腹邨餉足紅椒俗名

川椒野人喜啖之日映葵花豔風輕柿葉凋何須武陵去此地

絕塵囂

秋日出遊晚歸

草際蟲吟苦林中倦鳥還殘霞猶在水落日漸沈山攜

茶邨翁急驅牛牧豎閒分明城郭近暝色有無間

山寺

蕭寺空山裏攀蘿曲徑尋茅庵依絕巘鐘梵出深林瓦落蜂巢結苔荒屐齒侵老僧無定跡來去白雲心

臨水

脩然臨水際幽興此中添翠鳥窺魚穴紅蜓立石尖波平苔散髮潭定鏡開匳何必濠梁想會心應不嫌

食蟹

磊落一何壯盤餐味少畱堅齏俗作齏誤憑利齒家釀出新

筠黃破霜前橘紅分月下
搗底須第一飽東海問蟾蜍

冬日途中卽景

朔氣忽淩兢雲山幾萬層
陰崖多積雪淺水半成冰
天迴雁聲遠地寒霜氣凝
那堪迢遞路衣薄苦難勝

姑河曉渡

在萊陽西南經卽墨入海所謂姑尤以西者也

寒流尋古渡清曉發長隄
霜重侵沙冷煙濃壓水低
雁鳬驚曲渚星月落前溪
難辨遠邨樹冥濛一色迷

雪夜

日暮不知昏寒深雪擁門
高天空色相大地一胚渾
纔

覺霑衣溼旋思挾纈溫子猷殊解事眠覺便開尊

寒食前一日懷幼弟允文

自別斯人後餘音久不聞書還存舊篋

偶覩遺書
愴然隕涕

草已

長新墳半載猶同席千秋各異羣春風寒食節桃粥一
家分

濟南道中

竟被虛名誤行蹤類轉蓬青山千里月黃葉一林風病
謝相如渴途甘阮籍窮誰憐遊子意搔首送歸鴻

許山濼

作阿
作泊

鄒平西十里先是一片水田菱荷魚鳥風景絕
人近時堰以沙土水鄉竟爲原田又其地有墨
王亭今廢詩以存其概云

墨王傳舊蹟澤國變芳塍山果空街落湖魚晚市登風
浪饒古樸地僻絕羣凌但解邨中樂誰知問武陵

伏生碑

漢代傳經里荒煙訪故居身曾爲博士女亦識尙
書學綜五三後年過九十餘遺碑瞻道左摩挲重唏噓

讀平聲

牛山二首

榮華能幾許富貴使人愁不下此山淚誰爲孺子牛峴
碑同雪涕羊叔自風流若戀山河美請君問爽鳩

千駟安能累百年更可憂山河皆帶感家國不生愁

春秋載公出田十有七日而不反落日空山澹浮雲大野流蒼茫惟一

氣何處辨營工

冬夜

漏斷人聲定城嚴夜拆敲參橫茅屋角月挂竹林梢枯
坐蝸黏壁羈棲鵲失巢一鐙渾是伴間數落花拋

除夕前一日

歲事行將暮星杓看復迴雪隨冬後盡梅傍臘前開折
紙書門帖安箋漉凍醅東君連夜至矯首上春臺

春初感懷

壯心殊未已愁思鎮相牽篝火鐙殘夜春雲日暮天茅
齋成坐隱詩卷當參禪早歲驚霜鬢余年廿八始見二毛終期雪
此言

勵志 二首

白屋皆能貴青雲獨未通幻思春夢裏豪氣酒盃中書
劍應嗟晚文章豈固窮丈夫須有立何得老桑蓬

不是貂裘敝甯將鵲印歸生駒經挫折薤劒起光輝冬
雪藏頭蟄春雷破壁飛從來流水少莫怪識音稀

正月廿九日東萊道中曉發

近海雲多暗遙山氣未青寒溪浸殘月深柳出疎星邨
去二三里煙連長短亭誰憐多病客飄泊任流萍

曉渡蒲臺河

煙光分柳岸曉色入蒲臺近渡春流闊衝寒小榜開城
連波影動人破水痕來欲效濟川用恐非舟楫才

夜渡蒲臺河

夜色滿河洲一篙離岸頭煙痕沈極浦鐙影亂中流纔
覺葦杭轉乍驚星斗浮依稀近古渡身已下輕舟

將抵家

半載長安客居然幾度春鄉音經耳熟山色與人親見
面兒翻避聞聲犬自馴入門心轉急不復正衣巾

甯戚冢

在平度州東

難挫英雄氣清商扣角歌鯉長溪漲水牛茁草綠坡風
雨單衣臥星霜白石過身逢圖霸主猶自老巖阿

霜風何冷落孤冢尙焦爍始信眞賢達非終老牧樵爍

暉庭外動角響月中遙千載荒原上牛暝伴寂寥

渡淮河

卽濰水

岸平濰水闊擊楫渡中流影浸千邨樹波搖一葉舟
情付秋水身事逐浮漚欲問囊沙處濤聲帶雨愁

秋雨夜坐

暗竹藏螢火空階咽晚蛩如何今雨夜竟絕故人蹤
徑溼泥全滑苔黏屐半濃孤鐙昏欲灺坐久意疎慵

雨過

雨過山如洗雲歸樹欲畱忽然驚蟋蟀倏已入商秋小

草芟逾長疎花晚更稠習閒籬落久端不厭清幽

愛竹軒偶吟

愛竹開幽徑非關與世逃樹多嫌屋仄雲淨識山高不
學窺園董聊同運甕陶夜來疎雨過商意滿林皋

許山樂

最是幽奇處萍蹤未及遊好山全入畫遠水更宜秋樹
影藏游騎漁人聚小洲王郎讀書地見漁洋詩話到此重淹

苦熱

夙有園林癖况經苦熱心任披羅瑟瑟終戀樹陰陰荷
沼浮寒碧槐庭落碎金永懷濠濮上尊酒共棲尋

深秋晚景 二首

蕭瑟度寒雁素秋行復過白沙潦水盡黃葉暮山多晚
架收籬豆空場設雀羅前邨日將夕谷口下樵歌

滿目皆蕭索煙凝日漸昏草枯原野闊霜下果蔬存場
圃餘麻母人家穫稻孫牛羊來已暮隱約入前邨

山行記程 四首

虎斑石

山石嵌凸巖穴窅冥兩山對峙北嶺之半有竅
石色斑如昔人所稱虎穴者也其西稍高有蘭
若形制古樸迤東而下茅舍一區僧徒居之山
木翳鬱楓楮甚多又有如阜莢而無牙者其草
羅生石畔翠葉纖長蓋吉祥麥冬之類紅葉酣
霜綠蘿抱石亦奇觀也余以辛亥初冬阻風雨
其下興言記之

虎子何年去空山見虎斑風生洞口峭雲臥石根閒老
木秋先瘦疎花晚更殷從今風雨避不數二陵間

許家臺

邨臨絕岸地勢如臺是日阻雨宿焉

曲徑泥猶滑荒邨客暫停晚煙林色白山雨石痕青斷
響餘檐滴烘衣向竈徑主人殊不惡對客話寒鐙

林家巖

邑人以山路崎嶇者爲巖讀音如線蓋近俗別字也廣韻集韻嶮音虛檢切是知巖

正文當爲嶮

山形險峻盤旋而上行者難之巖之陰皆荒草
曲徑微通劣容足跡面壁而進視瞻勿回其陽
多苞櫟棘荆拉雜參塗凡三四里始達平地

鳥道盤空上人蹤盤險過衣防牛棘曳面苦石棱磨徑
仄疑無地途迴類轉螺天從山際出何怪拂雲多

上崖頭

由林家巖數里路漸平乃見小邨

蕭條秋晚後慘淡雨餘天黃葉滿邨路青山多墓田外
間人不到此處地尤偏颯颯風林過征途倍黯然

瓜田

草聚圓蝸舍瓜生方郢田聞香來得得披蔓摘絲絲地
僻知延客人澆不取錢龍蹏與狸首入齒漱甘泉

蓮人

蓮子爲面殼爲衣

的白宜爲面衣青雅稱身胸中非有物足下是何人色
相終成幻巾袍恰逼真浮生同過客夢繞採蓮津

君豈有知者與生同一般居然真面目休笑假衣冠露
墜花房冷煙深水國寒浮沈如我輩應作此人看

步和徐曉初七夕雨

良會動經歲暫時歡愛生獨憐游宦客長感別離情海

國秋應早

徐廣東
和平人

魚書寄未成遙知蕉葉雨偏向綺筵

傾

次韻繭園劉太翁年丈蘆筍詩

芽茁蘆侵岸聲喧鳴滿灘莫教爭呬嚙畱取供盤餐味
亞絲萼脆鮮侔雪蕩寒葭蒼秋色老吟徧幾千竿

七月望後一日雨中奉邀繭園翁小酌壘前韻

檐溜未成瀑庭坳如下灘特來尋舊雨因便勸加餐味
薄頻羞儉酒傾更畏寒烹鮮唯縮項新買釣魚竿

鮮繭翁壘
稱之故及

鱖魚
頗新

八月一日雨中種諸葛菜

不是凡蔬品名傳自武鄉公非老圃輩我愛菜根香概

種畱鋤處攤泥趁雨忙
思人猶愛樹珍重莫輕嘗

迎春花

春風如有待遲緩度芳辰
花解逢迎意人餘嬾散身
笑梅舒靨冷憐柳折腰新
偃蹇應憎我韶華落後塵

孫男聯

孫聯芬

校字

曾孫國

瑞國

同校字